



ZAKON O IZMJENAMA I DOPUNAMA

ZAKONA O UBLAŽAVANJU NEGATIVNIH EKONOMSKIH POSLJEDICA IZAZVANIH PANDEMIJOM KORONA VIRUSA

(hitni postupak)

Juli, 2020.godine

PRIJEDLOG ZA DONOŠENJE ZAKONA PO HITNOM POSTUPKU

Predlažemo da se zakon o izmjenama i dopunama Zakona o ublažavanju negativnih ekonomskih posljedica doneše po hitnom postupku, u skladu članom 191. Poslovnika o radu PD FBIH i članom 186. Poslovnika o radu Doma naroda koji predviđaju da se zakon može donijeti po hitnom postupku samo ako se tim zakonom uređuju odnosi i pitanja za čije uređivanje postoji neodložna potreba i ako bi donošenje zakona u redovnom postupku moglo izazvati štetne posljedice.

OBRAZLOŽENJE

Medicinska kriza i dalje traje tako da akutno stanje ekonomije sa kriznim šokovima nije u potpunosti prevaziđeno, što jasno implicira da firme i dalje trebaju mjeru aktivne podrške, odnosno imaju ogromne probleme nelikvidnosti, posebno izvozna industrija, turizam, trgovina i obrt. U socijalnoj sferi je stanje ekstremno pogoršano zbog rasta nezaposlenosti, smanjenja plaća i doznaka iz dijaspore. Procjene Svjetske banke da će porasti ekstremno siromaštvo na Zapadnom Balkanu se pokazuju ispravnim¹. Stoga smatramo kako je izuzetno važno predložene izmjene razmatrati po hitnom postupku, kako bi se izbjegao pravni vakum u djelovanju Korona zakona.

¹ Prema procjeni Svjetske banke, zbog krize izazvane koronavirusom u Bosni i Hercegovini će 35.000 do 85.000 osoba dodatno postati siromašno, odnosno živjet će sa manje od 3,9 dolara kupovne moći dnevno a 60 posto tih ljudi nije obuhvaćeno nikakvim programom državne pomoći.

ZAKON O IZMJENAMA I DOPUNAMA

ZAKONA O UBLAŽAVANJU NEGATIVNIH EKONOMSKIH POSLJEDICA

DIO PRVI – UVODNE ODREDBE

ČLAN 1.

Član 1. Mijenja se i glasi:

Predmet

Ovim zakonom propisuju se: subvencioniranja doprinosa za obavezna osiguranja, obustava obračuna i plaćanja zatezne kamate na javne prihode, ukidanje obaveza plaćanja akontacije poreza na dobit, ukidanje obaveza plaćanja akontacije poreza na dohodak od samostalne djelatnosti, prekid obračuna zateznih kamata na zakašnjela plaćanja u dužničko-povjerilačkim odnosima, prekid prinudne naplate, održavanje stabilnosti pojedinih isplate, isplate jednokratne naknade dugoročno nezaposlenim licima, subvencioniranje kamata na kredite odgoda primjene propisa u Federaciji Bosne i Hercegovine (u daljnjem tekstu: Federacija), te uspostava Garancijskog fonda.

DIO DRUGI – MJERE ZA UBLAŽAVANJE NEGATIVNIH POSLJEDICA

ČLAN 2.

Član 4. mijenja se i glasi

Subvencioniranje

(1) Subvencioniranja doprinosa za obavezna osiguranja iz propisa o doprinosima vrše se u skladu sa odredbama ovog zakona iz sredstava Budžeta Federacije.

(2) Poslovni subjekti iz člana 2. tačka a) ovog zakona imaju pravo na subvencioniranje doprinosa u skladu sa ovim zakonom u iznosu 244,85 KM mjesечно po svakom zaposlenom počevši od obračuna i isplate bruto plaće za april 2020. godine i svaki naredni mjesec, uključujući i obračun i isplatu plaća **zaključno sa 30.09.2020.godine**. Subvencioniranje doprinosa za svakog zaposlenog vrši se na način da se za penzиона-invalidsko osiguranje usmjerava 135,70 KM, za zdravstveno osiguranje 97,35 KM i za nezaposlenost 11,80 KM, ukoliko u mjesecu za koji se vrši obračun plaće imaju pad ostvarenog prometa 20% i više u odnosu na ostvareni promet u istom mjesecu 2019. godine.

(3) Isplata najniže neto plaće zaposlenim iz stava (2) ovog člana nije uslovljena istovremenim plaćanjem subvencioniranih doprinosa.

(4) Ostvareni promet iz stava (2) ovog člana utvrđuje Federalno ministarstvo finansija – Porezna uprava Federacije Bosne i Hercegovine (u dalnjem tekstu: Porezna uprava) na osnovu podataka o evidentiranom prometu putem fiskalnih sistema na serveru Porezne uprave.

(5) Pravo na subvencioniranje doprinosa u skladu sa odredbama ovog zakona imaju i poslovni subjekti koji shodno propisima o fiskalnim sistemima nisu u sistemu fiskalizacije.

(6) Za samostalne poduzetnike i poslovne subjekte u niskoakumulativnim djelatnostima za koje su propisane osnovice manje od najniže bruto plaće subvencioniranje doprinosa za april tekuće godine i svaki naredni mjesec, uključujući i obračun i plaćanje doprinosa vrši se u visini iznosa doprinosa utvrđenih na propisane mjesečne osnovice za tekuću godinu.

(7) Pravo na subvencioniranje doprinosa imaju poslovni subjekti i poduzetnici iz st. (2), (5) i (6) ovog člana uz uslov da su izmirene obaveze za doprinose i porez na dohodak uz isplaćene plaće zaključno sa februarom 2020. godine.

(8) Poslovni subjekti i samostalni poduzetnici iz st. (2), (5) i (6) ovog člana dužni su dostaviti Poreznoj upravi zahtjev za subvencioniranje i porezne prijave iz propisa o doprinosima i propisa o porezu na dohodak do desetog u tekućem mjesecu za prethodni mjesec.

(9) Porezna uprava daje pisana uputstva o načinu podnošenja zahtjeva i o potrebnoj dokumentaciji iz stava (8) ovog člana.

ČLAN 3.

Član 10. mijenja se i glasi

Moratorij

(1) Prekida se obračun zateznih kamata na zakašnjela plaćanja u dužničko-povjerilačkim odnosima u periodu od 01.03.2020. godine **do 30.09.2020.godine za poslovne subjekte koji koriste subvencije iz člana 4. ovog zakona.**

(2) Prekida se prinudna naplata shodno odredbama propisa o unutrašnjem platnom prometu i propisa o Poreznoj upravi **do 30.09.2020.godine za poslovne subjekte koji koriste subvencije iz člana 4. ovog zakona.**

ČLAN 4.

Član 11. mijenja se i glasi

Održavanje stabilnosti pojedinih isplata

U cilju održavanja stabilnosti i pravovremenih isplata penzija i invalidnina i drugih socijalnih davanja na dostignutom nivou, a imajući u vidu posljedice pada prihoda izazvanih stanjem nesreće, nedostajuća sredstva će se osigurati uštedama u okviru Budžeta Federacije za 2020. godinu.

ČLAN 5.

Član 12. mijenja se i glasi

Odgoda primjene propisa

- (1) U periodu **do 30.09.2020.godine** propisi donešeni na nivou Federacije kojima je uređeno namjensko korištenje sredstava neće se primjenjivati.
- (2) Odluke o prenamjeni sredstava iz stava (1) ovog člana donosi Vlada Federacije Bosne i Hercegovine (u dalnjem tekstu: Vlada Federacije), vlade kantona, gradonačelnici i načelnici općina.
- (3) Sredstva iz stava (2) ovog člana mogu se koristiti isključivo za namjene saniranja zdravstvenih, socijalnih i ekonomskih posljedica proglašenog stanja nesreće.

ČLAN 6.

Član 13. mijenja se i glasi

Uspostava Garancijskog fonda

- (1) Ovim zakonom uspostavlja se Garancijski fond (u dalnjem tekstu: Fond) na osnovu kojeg će, u ime i za račun Federacije garancije izdavati Razvojna banka Federacije Bosne i Hercegovine (u dalnjem tekstu: Razvojna banka).
- (2) Inicijalna sredstva za osnivanje Fonda u iznosu do 80.000.000 KM osigurat će se preusmjeravanjem raspoloživih sredstava Vlade Federacije iz komisionih poslova i raspoloživih sredstava namjenskih depozita Vlade Federacije koja se vode kod Razvojne banke.
- (3) Vlada Federacije će u roku od 30 dana od dana stupanja na snagu zakona Uredbom propisati pravo na subvencije za kamate na 50% iznosa kamata na kredite garantirane Garantnim fondom do 31.12.2021. godine“.
- (4) Razvojna banka dužna je kvartalno izvještavati Vladu Federacije o upravljanju Fondom, a Vlada Federacije u roku 15 dana po završetku kvartala dostavlja isti izvještaj Parlamentu Federacije Bosne i Hercegovine.
- (5) Vlada Federacije će na prijedlog Federalnog ministarstva finansija propisati način finansiranja, održavanja i upravljanja Fondom, ograničenja i uslove izdavanja garancija, te druge pojedinosti od značaja za funkcionisanje Fonda.

ČLAN 7.

Iza člana 13. zakona dodaje se novi član koji glasi:

Član 13a

Jednokratna pomoć nezaposlenim licima

Kao jednokratna pomoć dugotrajno nezaposlenim ranicima uredno prijavljenim na Zavodu za zapošljavanje isplaćuje se jednokratna novčana naknada od 200 KM ukoliko ne primaju naknadu za nezaposlenost po drugom osnovu.

DIO TREĆI – PRIJELAZNE I ZAVRŠNE ODREDBE

ČLAN 8.

Član 15. mijenja se i glasi

Obvezno zdravstveno osiguranje

Propisuje se obavezno zdravstveno osiguranje svim građanima Federacije **do 01.10.2020.godine.**

ČLAN 9.

Član 16. mijenja se i glasi

Stupanje na snagu i prestanak važenja

Ovaj zakon stupa na snagu narednog dana od dana objavljivanja u "Službenim novinama Federacije BiH" i **prestaje važiti 01.10.2020.godine**

OBRAZLOŽENJE ZAKONA O IZMJENAMA I DOPUNAMA ZAKONA O UBLAŽAVANJU NEGATIVNIH EKONOMSKIH POSLJEDICA

I. USTAVNA OSNOVA

Ustavna osnova za donošenje izmjena i dopuna Zakona o ublažavanju negativnih ekonomskih posljedica je u članu III. 1. tačka c) Ustava Federacije Bosne i Hercegovine koji je izmijenjen amandmanima VIII, LXXXCX i CVI i članu IV. A 20. (1) d) Ustava Federacije Bosne i Hercegovine, prema kojima je u isključivoj nadležnosti Federacije Bosne i Hercegovine donesenje propisa o finansijama, a parlament Federacije BiH uz ostale ovlasti predvidene Ustavom Federacije Bosne i Hercegovine odgovoran je za donesenje zakona o obavljanju dužnosti u federalnoj vlasti.

II. RAZLOZI ZA DONOŠENJE ZAKONA

Ovaj zakon je predložen u cilju ublažavanja negativnih ekonomskih posljedica po privredu Federacije, imajući u vidu negativne ekonomske i socijalne posljedice koje će u narednom periodu nastati kao kontinuitet posljedica zdravstvene krize, s obzirom da je veliki broj privrednih subjekata obustavio rad što je dovelo do značajnog poremećaja normalnih tokova poslovanja.

III. USKLAĐENOST S PROPISIMA EVROPSKE UNIJE

Nakon uvida u propise Evropske unije i analize odredaba ovoga zakona, nije ustanovljeno da pravo EU sadrži izvore koji su relevantni za predmet uređivanja predmetnog zakona.

IV. OBRAZLOŽENJE POJEDINIH ODREDBI

Članom 1. Dopunjava se predmet uređivanja ovoga zakona.

Članom 2. Produžava se rok primjene mjere subvencioniranja.

Članom 3. Produžavaju se rokovi primjene moratorija iz člana 10 osnovnog zakona.

Članom 4. Briše se odredba koja je onemogućila usklađivanje penzija i socijalnih naknada

Članom 5. Produžava se rok odgode primjene propisa donešenih na nivou Federacije kojima je uređeno namjensko korištenje sredstava

Članom 6. Propisuje se pravo na subvencije za kamate na kredite u iznosu od 50% od bankarske kamate za privredna društva i obrte do kraja 2021.godine.

Članom 7. Uvodi se jednokratna pomoć dugoročno nezaposlenim

Članom 9. Propisuje se obavezno zdravstveno osiguranje svim građanima Federacije do 01.10.2020.godine.

Članom 10. Propisuje se da zakon stupa na snagu narednog dana od dana objavljivanja u "Službenim novinama Federacije BiH" i prestaje važiti 01.10.2020.godine

V. FINANSIJSKA SREDSTVA

Za provedbu ovoga zakona koristit će se sredstva Stabilizacijskog fonda F BiH određena rebalansom proračuna F BiH za 2020. godinu.

PRORAČUN EFEKATA ZAKONA


Prijedlog intervencija u privredi temelji na projekciji faza razvoja ekonomske krize u funkciji dinamike zdravstvenog aspekta krize.

Prema iznesenom scenariju ulazak ekonomije BiH u recesiju dešava se u drugom tromjesečju 2020. godine i recesija traje ukupno godinu i po dana do trećeg tromjesečja 2021. godine (tehnička definicija recesije je da je to pad ekonomije koji je obilježen padom BDP u dva uzastopna tromjesečja, a završava se kada ekonomija postigne rast u dva uzastopna tromjesečja). Depresija obično počinje kada i recesija, ali se kasnije završava onda kada se dostigne nivo BDP koji je prethodio krizi. Depresija počinje početkom 2020. godine, a okončava se koncem 2022. godine, što znači da traje pune tri godine.

- U periodu mart-juni 2020. godine ekonomski pad i zaključavanje ekonomije (lockdown)
- U periodu juni 2020-decembar 2021 faza otvaranja ekonomije i oporavka koji se izražava do prvog tromjesečja 2021. godine u padu negativnih stopa rasta, a od drugog tromjesečja 2021. godine u pozitivnim stopama rasta BDP
- U periodu januar 2022-decembar 2022 započinje faza ekonomskog rasta

Ovakvo sekvencioniranje krize temelji na procjenama Svjetske banke, IMF i Svjetskog instituta za međunarodnu ekonomiju iz Beča (WIIW). Prema WIIW ekonomski pad se predviđa na nivou od 5% u 2020. godini, a zatim u 2021. se predviđa rast od 3% i u 2022. od 3,2%.

Slika 1. Stope rasta BDP po tromjesečjima 2019-2022.)



Izvor: za 2019. i prvo tromjeseće 2020. BHAS, prvi rezultati BDP za 1. kvartal 2020. godine, ostalo procjene na bazi WIIW 2020. (<https://wiiw.ac.at/webinar-looking-for-shelter-from-the-storm-e-470.html>)

Ukupni napor na intenziviranju ekonomskog oporavka i mjere koje se predlažu moraju biti podržani neodložnim usvajanjem nekoliko važnih zakona kao što su Zakon i porezu na dohodak u F BiH, Zakon o doprinosima u F BiH, Zakon o minimalnoj plaći u F BiH, Zakon o izmjenama i dopunama Zakona o radu (u dijelu koji se odnosi na skraćeno radno vrijeme) i Zakon o stečaju.

Usvajanje navedenih zakona sa primjenom od 1.1.2021. godine bit će od odlučujućeg značaja za oporavak i ekonomski rast i moglo bi dati jasnu viziju radnicima, poslovnoj zajednici i cijelokupnoj javnosti BiH o stvarnim izgledima za ubrzanje izlaska iz krize.

Na osnovi iznesenih pretpostavki u nastavku se daju procjene efekata mjera predloženih u Korona 2 zakonu.

1. Producenje subvencija za doprinose na minimalne plaće do 30.9.2020. (opciono 31.12.2020.)

U svom prijedlogu zakona Vlada F BiH nije dala nikakav proračun efekata ove mjere za drugo tromjeseče 2020.

Podaci PU F BiH pokazuju da je u aprilu 2020. bilo za subvencije prijavljeno 25.070 firmi sa 174.497 zaposlenih radnika i iznosom subvencija od 40.463.865 KM. U maju mjesecu 2020. prijavljeno je 20.934 firmi ili 16,5% manje nego u aprilu, sa 148.708 zaposlenih ili 14,8% manje i iznosom subvencija od 34.113.126 KM ili 15,7% manje nego u aprilu 2020. U odnosu na ukupan broj firmi od oko 120 hiljada (privredna društva i obrti), udio firmi koje su u aprilu tražile subvencije je 20,9%, a u aprilu 17,4%. Ukupan broj zaposlenih na koje se odnosi subvencioniranje u aprilu je bio 34,2%, a u aprilu 28,9%.

Ti podaci pokazuju da se bilježi blagi oporavak i da se smanjuje broj firmi koje se imali visoke padove u prihodima, odnosno broj radnika za koje se traže subvencije. Trend smanjenje se može i dalje очekivati sa smanjenom progresijom, pa se uz pretpostavku da se u junu ostvari dalje smanjenje od 10%, u julu može очekivati pad od 8%, u augustu od 7% i u septembru pad od 5%.

Na tim pretpostavkama planirani obim mjesecnih subvencija dat je u tabeli 1.

Tabela 1. Proračun iznosa subvencija za doprinose na minimalne plaće za treće tromjeseče 2020. i obuhvata radnika tim subvencijama

Mjesec 2020. godine	Broj radnika	Iznos u KM
April	174.497	40.463.865
Maj	148.708	34.113.126
Juni	133.837	30.701.813
Ukupno drugo tromjeseče	457.042	105.278.801
Juli	123.130	28.245.668
August	114.510	26.268.471
Septembar	108.785	24.955.047
Ukupno treće tromjeseče	346.425	79.469.186
Ukupno dva tromjesečja	803.467	184.747.987

Izvor: Podaci PU F BiH za april i maj 2020, ostalo procjene predлагаča zakona

Navedeno smanjenje izdvajanja za subvencije može ići sa različitim kretanjem broja firmi koje traže subvencije, ali je najvažnije da se smanjuje broj radnika u tim firmama na koje s odnose subvencije. I pored takvog smanjenja, ostalo bi u firmama sa padom prometa do 20% i više oko 100 hiljada radnika, odnosno između 19 i 20% ukupno zaposlenih u F BiH. To ubjedljivo govori u prilog nastavku mjera subvencioniranja, jer bi u protivnom, pad zaposlenosti mogao dobiti u zamahu.

2. Subvencije kamata na kredite

Krediti dobiveni uz garancije iz Garantnog fonda F BiH trebalo bi da se subvencioniraju u periodu do 31.12.2021. godine, datuma u kome bi se završio period oporavka, nakon čega bi trebalo da započne period ekonomskog rasta.

Ukupan obim kredita od 1 milijarde bio bi predmet subvencija u procjenjenom trajanju od godinu dana. Budući da je prosječna kamatna stopa poslovnih banaka za srednjoročne kredite malim i srednjim poduzećima oko 4%, prijedlog da se subvencionira 50% troškova kamata značio bi potrebu da se financira 2% kamate na taj iznos kreditne mase. Budući da se Uredbom o korištenju Garantnog fonda predviđa mogućnost kreditiranja na rok od 60 mjeseci sa grace periodom (period od datuma početka korištenja do datuma početka otplate kredita) od 18 mjeseci, uzima se pretpostavka da će subvencioniranje kredita pokrivati 50% kamata u godinu dana grace perioda. To daje cifru subvencija kamata od 20 miliona KM.

Ovdje je važno istaći da bi poslovne banke čiji bi se krediti koristili garancijama iz Garantnog fonda F BiH MORALE garantirati fiksnu kamatnu stopu, jer bi promjenljive kamatne stope unijele veliku neizvjesnost u čitav sistem garancija i znatno otežale oporavak. Fiksne kamatne stope i predviđanja da se njihova visina neće mijenjati je jedan stubova oporavka u EU i banke u BiH, čije su majke sve iz EU ne bi smjele na području BiH narušiti politiku jeftinog novca, niti za to ima objektivnih razloga, barem za kredite koji se garantiraju iz Garantnog fonda.

Uz sve navedeno, postoje mogućnosti da drugi nivoi vlasti, kao što su kantoni i gradovi i općine, osiguraju mјere za subvencioniranje kamata prema specifičnostima nosilaca kreditnih zaduženja i namjenama kredita u tim sredinama.

3. Jednokratna isplata trajno nezaposlenim osobama prijavljenim na Zavodu za zapošljavanje F BiH

Prema podacima iz tabele 2 više od 2 godine traže posao 195.453 osoba, odnosno 60% ukupno prijavljenih kod Zavoda za zapošljavanje F BiH.

Tabela 2. Lica koja traže zaposlenje prema dužini trajanja nezaposlenost (sa stanjem na dan 31.5.2020.)

Elementi		Dužina trajanja nezaposlenosti						
		Ukupno:	do 12 mjeseci	13-24 mjeseca	25-36 mjeseci	37-60 mjeseci	61-96 mjeseci	97 i više mjeseci
1. UKUPNO	Svega	325,658	91,281	38,944	26,480	26,857	31,390	110,706
	Žene	189,364	44,771	20,773	15,820	16,652	18,942	72,406

Izvor: Federalni zavod za zapošljavanje, neobjavljeni podaci

Navedenu brojku dugotrajno nezaposlenih treba umanjiti za broj od 17.500 demobiliziranih boraca koji primaju naknadu po Zakonu o pravima demobiliziranih boraca i članova njihovih porodica u F BiH i oko 5.000 korisnika naknada po propisima kantona i gradova/općina, što čini ukupno 22.500 osoba. Tako se dobije brojka od 172.953 osobe koje nemaju nikakve naknade za vrijeme trajanja nezaposlenosti i kojima bi se namijenila jednokratna naknada od 200 KM.

Jednokratna naknada od 200 KM za ublažavanje njihovog socijalnog položaja zahtjeva izdvajanje oko 34.590 hiljada KM iz Stabilizacijskog fonda.

Osnovno načelo za dodjelu ove naknade je da je osoba prijavljena na Zavodu najmanje 24 mjeseca u stalnom trajanju i da nema kao pojedinac nikakva primanja za vrijeme trajanja nezaposlenosti.

4. Rezime ukupnih efekata predloženih mјera

Na osnovi iznesenih prikaza ukupni efekti predloženih mјera obuhvataju efekte ekonomskih mјera i socijalne snošljivosti krize.

Mјere produženja subvencija za doprinose na minimalne plaće za firme koje u odgovarajućim mjesecima trećeg tromjesečja imaju pad prihoda od 20% i više, dat će podršku održavanju zaposlenosti u firmama pogodenim krizom, a istovremeno će potpomoći i rast zaposlenosti u firmama koje imaju izglede da povećaju prihode u kratkoročnom razdoblju.

Subvencioniranja kamata na kredite u visini od 50% kamata na kredite u toku jedne godine korištenja tih kredita, omogućit će firmama koje koriste garancije Garantnog fonda da sa manjim troškovima pokrenu fazu oporavka i inicijalnih ulaganja i uhvate priključak za pokretanje oporavka i ekonomskog rasta.

Jednokratna isplata od 200 KM po osobi za dugoročno nezaposlene iznad 24 mjeseci koji nemaju nikakve prihode doprinite će socijalnoj snošljivosti kod ove kategorije stanovništva. Naknada će biti iskorištena za potrošnju i neposredno

će omogućiti vraćanje odrešenog dijela kroz poreze u javne fondove i budžet. Ona će svakako imati ograničeno djelovanje, ako ne uslijede suštinske promjene u poslovnom okruženju i oporavak kroz rast tražnje na izvoznim tržištima bosanskohercegovačkih firmi i rast tražnje u domaćim okvirima, u čemu poseban potencijal nude javne investicije.

Tabela 3. Struktura izdataka za podršku ublažavanju kriznih mjera i poticanja oporavka (KM)

Zakonski osnov	Vidovi angažiranja sredstava Stabilizacijskog fonda i RB F BiH				
	Subvencije doprinosa	Garantni fond	Subvencije kamata	Naknada nezaposlenim	Ukupno
Korona 1	105.278.801	20.000.000	0	0	125.278.801
Korona 2	79.469.186	0	20.000.000	34.590.000	134.059.186
Ukupno	184.747.987	20.000.000	20.000.000	34.590.000	259.337.987

Napomena: Garantni fond kapaciteta od 100 miliona KM angažira 20 miliona KM sredstava Stabilizacijskog fonda, a 80 miliona KM su sredstva Razvojne banke F BiH

Iz datog prikaza u prethodnoj tabeli vidljivo je da postoji prostor za dodatne intervencije iz Stabilizacijskog fonda, jer bi od **500 miliona sredstava bilo angažirano 259.337.987 KM, što znači da slobodna sredstva fonda iznose 240.662.013 KM.**